

Poštovani čitaoci,

Čast i zadovoljstvo mi je da u ulozi glavnog urednika predstavim prvi broj časopisa „Društveni ogledi“. Osnivanjem Centra za društvena istraživanja Internacionalnog Burč univerziteta, javila se ideja za pokretanjem naučnog časopisa koji bi predstavljao rezultat potrebe za ukazivanjem na bitna pitanja iz oblasti društvenih nauka, prevashodno prava, u teoriji i praksi. Časopis ima za cilj unapređenje naučno-istraživačkog rada u oblasti pravnih i drugih srodnih društvenih nauka, a namijenjen je svima koji se bave istraživačkim radom, nudeći im mjesto susreta, zbližavanja, premoštavanja različitih stavova i mišljenja, ostavljajući prostor zajedničkom djelovanju.

Uzimajući u obzir specifično pravno uređenje Bosne i Hercegovine, naročito u smislu približavanja evroatlanskim integracijama, časopis ima za cilj savladavanje poteškoća sa kojima se naša država susreće na tom putu, te iznalaženje mogućih rješenja kako u vidu teorijskog poimanja, tako i u praktičnom smislu.

Također, značaj časopisa se ogleda u tome što pruža mogućnost dijaloga na nivou cijele Bosne i Hercegovine i šire, te teži uspostavljanju jedinstvenog naučno-istraživačkog prostora internacionalnog karaktera. To je opredijelilo uređivački odbor da buduće brojeve časopisa selektira po tematskim cjelinama, odnosno aktuelnim pravnim pitanjima s kojima se Bosna i Hercegovina susreće u procesu pridruživanja Evropskoj uniji.

Zasluge za ovaj veliki projekt pripadaju kolegama sa Pravnog fakulteta Univerziteta u Sarajevu, Pravnog fakulteta Univerziteta u Tuzli, Pravnog fakulteta Univerziteta u Zenici, Pravnog fakulteta Univerziteta u Bihaću i Pravnog fakulteta Univerziteta u Mostaru, a naročitu zahvalnost iskazujemo Internacionalnom Burč univerzitetu, pokrovitelju cjelokupnog projekta.

Glavni urednik
Prof. dr. Abedin Bikić